

Na osnovu čl. 13. stav 1. tačka e) i 18. tačka b) Ustava Kantona Sarajevo ("Službene novine Kantona Sarajevo", br. 1/96, 2/96, 3/96, 16/97, 14/00, 4/01, 28/04, 6/13 i 31/17) i člana 8. Zakona o osnovama socijalne zaštite, zaštite civilnih žrtava rata i zaštite porodice sa djecom ("Službene novine Federacije BiH", br. 36/99, 54/04, 39/06, 14/09 i 45/16), Skupština Kantona Sarajevo, na sjednici održanoj dana _____godine, donijela je

Radni materijal

ZAKON
O IZMJENAMA I DOPUNAMA ZAKONA O SOCIJALNOJ ZAŠTITI, ZAŠTITI
CIVILNIH ŽRTAVA RATA I ZAŠTITI PORODICE SA DJECOM

Član 1.

U Zakonu o socijalnoj zaštiti, zaštiti civilnih žrtava rata i zaštiti porodice sa djecom ("Službene novine Kantona Sarajevo", broj: 38/2014-Prečišćeni tekst, 38/2016, 44/2017 i 28/2018) u članu 1. alineja 7. mijenja se i glasi:

"- rad i finansiranje organizacija i reprezentativnih organizacija osoba sa invaliditetom i rad i finansiranje organizacija i reprezentativnih organizacija civilnih žrtava rata".

Član 2.

Iza člana 1. dodaje se novi član 1a. koji glasi:

"Član 1a.

Pojedini izrazi u smislu ovog Zakona imaju sljedeće značenje:

- beskućnik je osoba koja nema gdje stanovati, boravi na javnom ili drugom mjestu koje nije namijenjeno za stanovanje i nema sredstava kojima bi mogla podmiriti potrebu stanovanja;

- samohrani roditelj je roditelj djeteta čiji je drugi roditelj umro, proglašen umrlim, spriječen da se stara o djetetu, nepoznatog boravišta, kojem je oduzeto roditeljsko staranje ili mu je oduzeta ili ograničena poslovna sposobnost;

- socijalni program je skup strateških mjera i aktivnosti koje su usmjerene na preveniranje i kratkoročno i srednjeročno otklanjanje stanja socijalne nesigurnosti pojedinih kategorija stanovništva".

Član 3.

Član 6. mijenja se i glasi:

"Član 6.

Prava po ovom Zakonu mogu ostvariti državljani Bosne i Hercegovine koji imaju prebivalište najmanje godinu dana na području Kantona Sarajevo (u daljem tekstu: Kanton).

Prava po ovom Zakonu mogu ostvariti strani državljani sa stalnim boravkom u Bosni i Hercegovini s posljednjim boravištem odnosno prebivalištem najmanje godinu dana na području Kantona."

Član 4.

Član 7. mijenja se i glasi:

"Član 7.

Izuzetno od člana 6. stav 1. prava po osnovu ovog Zakona mogu ostvariti osobe koje su 30.04.1992. godine imale prebivalište na području Kantona, pod uvjetom da im je utvrđen status povratnika.

Izuzetno od člana 6. stav 1. prava po osnovu ovog Zakona mogu ostvariti readmisirane osobe koje su posljednje prebivalište imale na području Kantona."

Član 5.

U članu 9. iza riječi: "prihod" dodaju se riječi: "osobe i".

U alineji 1. iza riječi: "odnosa" dodaju se riječi: "izuzev naknade za topli obrok i naknade za prijevoz".

Alineja 9. mijenja se i glasi:

"9. prihoda po osnovu privrednih, uslužnih, obrtničkih i srodnih djelatnosti".

Alineja 10. mijenja se i glasi:

"11. primanja po osnovu ugovora o djelu".

Član 6.

U članu 13. u stavu 1. riječi: "prosječna plaća" zamjenjuju se riječju: "osnov".

Član 7.

U Poglavlju: "II - SOCIJALNA ZAŠTITA", naziv Odjeljka: "1. Korisnici socijalne zaštite", mijenja se i glasi: "1. Pojam i korisnici socijalne zaštite".

Član 8.

Član 14. mijenja se i glasi:

"Član 14.

Socijalna zaštita je organizirana djelatnost od javnog interesa za Kanton čiji je cilj pružanje pomoći socijalno ugroženim osobama, kao i osobama u nepovoljnim ličnim ili porodičnim okolnostima, koja uključuje prevenciju, promicanje promjena, pomoć u zadovoljavanju osnovnih životnih potreba i podršku pojedincu, porodici i grupama, u svrhu unaprijeđenja kvalitete života i osnaživanja korisnika u samostalnom zadovoljavanju osnovnih životnih potreba te njihovog aktivnog uključivanja u društvo."

Član 9.

Iza člana 14. dodaje se novi član 14a. koji glasi:

"Član 14a.

Korisnici socijalne zaštite, pored korisnika utvrđenih Federalnim zakonom su i:

- osoba i domaćinstvo koji nemaju dovoljno sredstava za podmirenje osnovnih životnih potreba, a nisu ih u mogućnosti ostvariti od primanja iz člana 9. ovog Zakona;
- dijete žrtva porodičnog, vršnjačkog ili drugog nasilja, dijete žrtva trgovine ljudima, dijete u riziku, dijete bez pratnje koje se zatekne van mjesta svog prebivališta bez nadzora roditelja ili druge odrasle osobe koja je odgovorna starati se o njemu te dijete strani državljanin koje se

zatekne na teritoriju Kantona bez nadzora roditelja ili druge odrasle osobe koja je odgovorna starati se o njemu;

- porodica kojoj je zbog poremećenih odnosa ili drugih nepovoljnih okolnosti potrebna stručna pomoć ili druga podrška;

- odrasla osoba žrtva porodičnog ili drugog nasilja te žrtva trgovine ljudima; -
beskućnik;

- samohrani roditelj."

Član 10.

Član 15. mijenja se i glasi:

"Član 15.

Prava iz socijalne zaštite na osnovu ovog Zakona su: stalna novčana pomoć, novčana naknada za pomoć i njegu od strane druge osobe, druge materijalne pomoći, osposobljavanje za život i rad, smještaj u hraniteljsku porodicu, smještaj u ustanove socijalne zaštite i socijalne usluge."

Član 11.

U članu 16. iza stava 3. dodaje se novi stavovi 4. i 5. koji glase:

"Kantonalno ministarstvo može provoditi socijalne programe u skladu sa raspoloživim budžetskim sredstvima za tu namjenu.

Socijalne programe donosi Vlada Kantona na prijedlog Kantonalnog ministarstva."

Član 12.

U članu 18. u stavu 1. riječi: "prosječne plaće" zamjenjuju se riječju: "osnova".

Član 13.

U članu 21. u stavu 2. riječi: "ili domaćinstvo" brišu se, a riječi: "koji su ostvarili" mijenjaju se riječima: "koji je ostvario".

Član 14.

Član 22. mijenja se i glasi:

"Član 22.

Pravo na stalnu novčanu pomoć ne mogu ostvariti osobe i domaćinstva ako je osoba ili jedan ili više članova domaćinstva vlasnik privrednog društva ili ima registrovanu obrtničku ili srodnu djelatnost, osim ako je privredno društvo u postupku stečaja ili likvidacije, odnosno osobe i domaćinstva ako je osoba ili jedan ili više članova domaćinstva vlasnik motornog vozila, osim vozila koje služi za prijevoz osobe ili člana domaćinstva kojem je na osnovu Federalnog i ovog Zakona utvrđena potreba za pomoći i njegom od strane druge osobe."

Član 15.

U članu 23. riječi: "domaćinstva koja su ostvarila" mijenjaju se riječima: "korisnici koji su ostvarili".

Član 16.

U članu 25. broj "7." zamjenjuju se brojem "6.".

Član 17.

U članu 27. u stavu 1. riječi: "prosječne plaće" zamjenjuju se riječju: "osnova".

Član 18.

U članu 30. riječi: "prosječne plaće" zamjenjuju se riječju: "osnova".

Član 19.

U članu 31. u stavu 1. riječi: "izuzetne novčane pomoći" zamjenjuju se riječima: "uvećane jednokratne novčane pomoći".

Iza stava 1. dodaje se novi stav 2. koji glasi:

"Pravo na jednokratnu novčanu pomoć može se priznati i iz razloga koji nisu propisani u članu 18. Federalnog zakona, na osnovu mišljenja stručnog tima Službe".

Član 20.

Član 33. mijenja se i glasi:

"Član 33.

U posebno opravdanim slučajevima kada se potreba iz člana 18. Federalnog zakona ili iz člana 31. ovog Zakona ne može zadovoljiti jednokratnom novčanom pomoći, Služba može osobi ili domaćinstvu priznati uvećanu jednokratnu novčanu pomoć".

Član 21.

U članu 34. riječi: "izuzetne novčane pomoći" zamjenjuju se riječima: "uvećane jednokratne novčane pomoći".

Član 22.

Član 34a. briše se.

Član 23.

U članu 35. u stavu 1. riječi: "kroz osnovno školovanje u redovnim školama ili školama specijalnog tipa koje mogu imati internatski smještaj" zamjenjuju se riječima: "u redovnim osnovnim školama ili drugim odgojno-obrazovnim ustanovama u kojima se izvode posebni nastavni planovi i programi".

Član 24.

U članu 36. riječi: "srednje škole specijalnog tipa koje mogu imati internatski smještaj ili" zamjenjuju se riječima: "u kojima se izvode nastavni planovi i programi za učenike s teškoćama u razvoju".

Član 25.

U članu 37. riječi: "a najkasnije do navršениh 40 godina života" brišu se.

Član 26.

Član 39. mijenja se i glasi:

"Član 39.

Djeca i odrasle osobe koje se nalaze na školovanju iz članova 35. i 36. ovog Zakona imaju pravo na cjelodnevni boravak ili smještaj internatskog tipa u odgojno-obrazovnim ustanovama u skladu sa zakonima iz oblasti obrazovanja.

Djeca i odrasle osobe iz stava 1. ovog člana ostvaruju pravo na uslugu boravka ili smještaj iz oblasti socijalne zaštite na osnovu mišljenja Stručne komisije, a odrasle osobe na osnovu mišljenja Stručne institucije.

Način pružanja usluge boravka iz stava 2. ovog člana utvrdiće se posebnim propisom iz člana 59a. ovog Zakona."

Član 27.

U članu 42. u stavu 3. riječi: "prosječne plaće" zamjenjuju se riječima: "od osnova".

Član 28.

Naziv Odjeljka: "7. Hraniteljstvo" mijenja se i glasi: "7. Smještaj u hraniteljsku porodicu".

Član 29.

U članu 58b. broj: "7." zamjenjuju se brojem: "6.".

Član 30.

U članu 58c. riječ: "privatnih" briše se, a iza riječi: "kapaciteta ustanove" dodaju se riječi: "ili više po prethodnom odobrenju Kantonalnog ministarstva".

Član 31.

Naziv Odjeljka: "9. Kućna njega i pomoć u kući" mijenja se i glasi: "9. Socijalne usluge".

Član 32.

Član 59. mijenja se i glasi:

"Član 59.

Socijalne usluge obuhvataju aktivnosti, mjere i programe namijenjene sprječavanju, prepoznavanju i rješavanju problema i poteškoća pojedinaca i porodica te poboljšanju kvalitete njihovog života u zajednici.

Socijalne usluge mogu se pružati tokom dužeg razdoblja ili privremeno, ovisno o potrebama korisnika.

Socijalne usluge organiziraju se kao usluge za djecu, mlade, porodicu i odrasle osobe, uz uvažavanje socijalnih veza i okruženja korisnika i porodice."

Član 33.

Iza člana 59. dodaju se novi članovi 59a. i 59b. koji glase:

"Član 59a.

Socijalne usluge, uvjeti za ostvarivanje i način pružanja socijalnih usluga utvrdiće se posebnim propisom koji donosi Vlada Kantona.

Član 59b.

Korisniku se primarno priznaje pravo na socijalne usluge u porodici i zajednici, a izuzetno, ako se tim uslugama ne mogu podmiriti potrebe korisnika, korisniku se priznaje pravo na zaštitu van vlastite porodice u obliku smještaja."

Član 34.

Član 60. mijenja se i glasi:

"Član 60.

Kućna njega i pomoć u kući je socijalna usluga koju može ostvariti starija i nemoćna osoba, osoba kojoj je zbog tjelesnog, mentalnog, intelektualnog ili osjetilnog oštećenja, trajnih promjena u zdravstvenom stanju ili privremenih promjena u zdravstvenom stanju na osnovu mišljenja Stručne komisije odnosno Stručne institucije potrebna pomoć i njega.

Kućnu njegu i pomoć u kući osoba iz stava 1. ovog člana može ostvariti ako ispunjava sljedeće uvjete:

- nije ostvarila pravo na novčanu naknadu za pomoć i njegu od strane druge osobe;
- nema mogućnost da joj pomoć i njegu osiguraju roditelji, bračni drug i djeca;
- nema mogućnost da pomoć i njegu osigura na osnovu ugovora o doživotnom izdržavanju;
- prihod po članu domaćinstva ne prelazi 30 % osnova iz člana 13. ovog Zakona."

Član 35.

Iza člana 60. dodaju se novi članovi 60a. i 60b. koji glase:

"Član 60a.

Kućna njega i pomoć u kući može obuhvatiti:

- organiziranje prehrane (priprema ili nabavka i dostava gotovih obroka u kuću);
- obavljanje kućnih poslova (dostava namirnica, pomoć u pripremanju obroka, pranje posuđa, pospremanje stana, donošenje vode, ogrjeva i slično, organiziranje pranja i peglanje, nabavka lijekova i drugih potrepština i dr.);
- održavanje lične higijene (pomoć u oblačenju i svlačenju, u kupanju i obavljanju drugih higijenskih potreba).

Član 60b.

Uslugu kućne njege i pomoći u kući mogu pružati ustanove, Crveni križ, nevladine organizacije i fizičke osobe kao profesionalnu djelatnost.

Način i uvjeti pružanja usluge kućne njege i pomoći u kući utvrdiće se propisom iz člana 59a. ovog Zakona."

Član 36.

Član 64. mijenja se i glasi:

“Član 64.

Postupak za ostvarivanje prava iz socijalne zaštite pokreće se na zahtjev osobe u stanju socijalne potrebe, člana domaćinstva, zakonskog zastupnika ili staraoca osobe ili po službenoj dužnosti.”

Član 37.

U članu 98. stavovi 3., 4. i 5. brišu se, a dosadašnji stav 6. postaje stav 3., koji se mijenja i glasi:

"U organizacionoj jedinici Kampusa iz stava 1. ovog člana formiraće se žensko i muško odjeljenje."

Član 38.

Naziv Poglavlja: "IV - Udruženja osoba sa invaliditetom" mijenja se i glasi: „IV – Organizacije i reprezentativne organizacije osoba sa invaliditetom i civilnih žrtava rata“

Član 39.

Iza Poglavlja: "IV – Organizacije i reprezentativne organizacije osoba sa invaliditetom i civilnih žrtava rata" dodaje se novi Odjeljak: "1. Organizacije osoba sa invaliditetom i organizacije civilnih žrtava rata"

Član 40.

Član 117. mijenja se i glasi:

"Član 117.

Organizacija osoba sa invaliditetom u smislu ovog Zakona, (u daljem tekstu: OOSI) je udruženje koje okuplja osobe sa istom vrstom invaliditeta, urođenog ili stečenog van ratnih okolnosti, kao i udruženje koje okuplja osobe sa statusom invalida rada bez obzira na vrstu invaliditeta, a koja djeluje u interesu svoga članstva i u javnom interesu, na svim područjima od značaja za njihov položaj, a koja su definirana UN Konvencijom o pravima osoba sa invaliditetom (u daljem tekstu: Konvencija).

OOSI okuplja osobe čiji je stepen invaliditeta preko 60% i koji u pravilu ostvaruju dodatak za njegu i pomoć druge osobe i svakodnevne aktivnosti ne mogu obavljati bez korištenja specijalnih tehničkih pomagala ili koriste specijalne tehnike u komunikaciji (Brajevo pismo, zvučna tehnika, gestovni govor i slično)."

Član 41.

Iza člana 117. dodaju se novi članovi 117a., 117b., 117.c., 117d., 117e., 117f., i 117g. koji glase:

"Član 117a.

Organizacija civilnih žrtava rata u smislu ovog Zakona, (u daljem tekstu: OCŽR) je udruženje koje okuplja osobe sa utvrđenim statusom civilne žrtve rata (u daljem tekstu: CZR), djeluje u interesu svoga članstva i u javnom interesu, na svim područjima koja su definirana Konvencijom kao i drugim područjima od značaja za njihov položaj.

Član 117b.

Svrha OOSI i OCŽR je da na osnovama dobrovoljnog udruživanja i zajedničkih potreba promovišu i zagovaraju, štite i ostvaruju interese populacije koju okupljaju, s ciljem postizanja jednakih mogućnosti i njihovog punog uključivanja.

Član 117c.

Radi postizanja svrhe i cilja djelovanja, u okviru svojih redovnih aktivnosti OOSI i OCŽR izvršavaju sljedeće zadatke:

- utvrđuju interese i zagovaraju prava i potrebe OSI i CŽR u svim područjima od značaja za njihov položaj;
 - doprinose senzibilizaciji javnosti i podizanju društvene svijesti o problemima i položaju OSI i CŽR;
 - djeluju po pitanjima prevencije nastanka invaliditeta;
 - kreiraju i provode programe koji pojedinim grupama OSI i CŽR omogućavaju aktivno učestvovanje, pristupačnost, uključivanje i samostalan život;
 - pružaju podršku pri ostvarivanju prava i potreba OSI i CŽR u oblastima socijalne i zdravstvene zaštite, odgoja i obrazovanja, rehabilitacije, radnog osposobljavanja i zapošljavanja, pravne zaštite, kulture, sporta i rekreacije;
 - provode aktivnosti i programe koji su u funkciji sprečavanja i ublažavanja društvenih i psihičkih posljedica invaliditeta, te razvijanja socijalnih vještina OSI i CŽR;
 - rade na poboljšavanju razumijevanja i provođenju odredbi Konvencije i drugih značajnih međunarodnih dokumenata koji uključuju pitanja invaliditeta, kako među populacijom koju okupljaju, tako i u sredini u kojoj djeluju;
 - rade na informisanosti OSI i CŽR o njihovim pravima i obavezama;
 - zagovaraju i djeluju na rješavanju pitanja arhitektonske i informacijsko-komunikacijske pristupačnosti, (uklanjanje arhitektonskih barijera, uvođenje i korištenje savremenih informacijsko-komunikacijskih tehnologija kao i znakovnog jezika, Brajevog pisma, augmentativne i alternativne komunikacije, te svih drugih dostupnih sredstava, načina i oblika komunikacije po izboru OSI i CŽR);
 - kontinuirano rade na unaprijeđenju kapaciteta organizacije;
 - osiguravaju transparentnost i javnost rada i rezultata rada;
 - potiču aktivnosti nadležnih institucija u cilju što uspješnijeg i bržeg rješavanja pitanja OSI i CŽR;
 - učestvuju u aktivnostima nadležnih institucija u kreiranju i definisanju mjera i akata koji uređuju pitanja od interesa za OSI i CŽR;
 - uspostavljaju i razvijaju saradnju s državnim institucijama, drugim OOSI i OCŽR i nevladinim organizacijama, na domaćem i međunarodnom nivou.
- OOSI i OCŽR mogu izvršavati i druge aktivnosti i zadatke koji su na osnovama općeg interesa članstva definisani osnivačkim aktima i programima organizacije".

Član 117d.

Zahtjev za sticanje statusa OOSI i OCŽR podnosi se Kantonalnom ministarstvu.

Član 117e.

Status OOSI i OCŽR može steći udruženje koje ispunjava sljedeće uvjete:

- da je registrovano u skladu sa važećim propisima,
- da ispunjava uvjete vezano uz članstvo u smislu članova 117. i 117a. ovog Zakona,
- da na osnovu akta o osnivanju i statuta djeluju u smislu člana 117b. ovog Zakona.

Član 117f.

Uz zahtjev za sticanje statusa OOSI i OCŽR, dostavlja se:

- rješenje o registraciji udruženja u skladu sa važećim propisima o udruženjima i fondacijama,
- statut,
- odluka o imenovanju organa upravljanja,
- spisak članova dostavljen na propisanom obrascu, čiji će se sadržaj utvrditi posebnim propisom iz člana 119d.

Član 117g.

O zahtjevu za utvrđivanje statusa OOSI i OCŽR, a na osnovu uvjeta propisanih u članu 117e. ovog Zakona rješava Kantonalno ministarstvo.

Rješenje kojim se rješava po zahtjevu iz stava 1. ovog člana, nadležno ministarstvo donosi na osnovu prijedloga komisije, koja se formira radi utvrđivanja ispunjenosti uvjeta predviđenih ovim Zakonom.

Komisija iz stava 2. ovog člana, može se formirati kao ad hoc ili kao stalno tijelo."

Član 42.

U članu 118. u alineji 4. iza riječi: "Kantona", dodaju se riječi: "po osnovu javnih poziva za pojedinačne projekte te budžeta".

Član 43.

Iza člana 118. dodaje se novi Odjeljak: "2. Reprezentativne OOSI i reprezentativne OCŽR"

Član 44.

Iza člana 118. dodaju se novi članovi 118a., 118b., 118c., 118d., 118e., 118f. koji glase:
"Član 118a.

Reprezentativne OOSI su organizacije koje okupljaju najveći broj članova iste vrste invaliditeta ili članova sa statusom invalida rada.

Reprezentativna OCŽR je organizacija koja okuplja najveći broj članova sa utvrđenim statusom CŽR iz populacije CŽR i članova porodice CŽR.

Član 118b.

Status reprezentativne OOSI i OCŽR utvrđuje Kantonalno ministarstvo provođenjem postupka javnog poziva za prikupljanje zahtjeva radi utvrđivanja statusa reprezentativnosti (u daljem tekstu: javni poziv za utvrđivanje statusa reprezentativnosti).

Član 118c.

Status reprezentativnosti može steći OOSI i OCŽR koja ispunjava sljedeće uvjete:

- da okuplja najveći broj članova na području Kantona,
- da uspješno realizira programe u vezi sa zadacima iz člana 117c. ovog Zakona,
- da posjeduje tehničke, materijalne i ljudske resurse za izvršavanje zadataka utvrđenih ovim Zakonom i statutom.

Član 118d.

Javni poziv za utvrđivanje statusa reprezentativnosti objavljuje se svake tri godine.

Prije isteka roka od tri godine, može se objaviti vanredni javni poziv za utvrđivanje statusa reprezentativnosti ukoliko reprezentativna organizacija, iz razloga propisanih ovim Zakonom, izgubi taj status.

Vanredni javni poziv objavljuje se u roku od 30 dana od dana objave rješenja o prestanku statusa reprezentativnosti u službenim novinama.

Status reprezentativnosti koji je organizacija stekla po vanrednom javnom pozivu, utvrđuje se za period do isteka roka od tri godine, kada je predviđeno objavljivanje javnog poziva.

Član 118e.

Po javnom pozivu za utvrđivanje statusa reprezentativnosti obavezno se dostavljaju sljedeći dokazi:

- dokaz o stečenom statusu OOSI i OCŽR;
- dokaz o ukupnom broju članova;
- dokaz o angažovanosti na izvršavanju zadataka iz člana 117c.;
- dokaz o posjedovanju tehničkih, materijalnih i ljudskih resursa za izvršavanje zadataka utvrđenih ovim Zakonom i statutom.

Javnim pozivom može se zatražiti i dostavljanje dodatne dokumentacije, u skladu sa aktuelnim prioritetima strateških dokumenata za unaprijeđenje položaja osoba sa invaliditetom.

Član 118f.

Javni poziv za utvrđivanje statusa reprezentativnosti objavljuje se u službenim novinama i najmanje dva dnevna lista.

Radi provođenja javnog poziva formira se komisija koja utvrđuje ispunjenost kriterija za sticanje statusa reprezentativnosti.

Na prijedlog komisije iz stava 2. ovog člana, Kantonalno ministarstvo donosi rješenje kojim se OOSI, odnosno OCŽR, utvrđuje status reprezentativnosti, ili rješenje kojim se ovaj zahtjev odbija."

Član 45.

U članu 119. stav 2. mijenja se i glasi:

"Finansiranje reprezentativnih OOSI i reprezentativne OCŽR koje djeluju na području Kantona finansira Kanton iz svog budžeta, u visini i na način koji na prijedlog Vlade utvrdi Skupština Kantona."

Stav 3. mijenja se i glasi:

"Finansiranje se vrši na način koji utvrdi ministar, a u svrhu podrške osnovnom funkcionisanju organizacije, radi izvršavanja programskih aktivnosti i zadataka."

Stav 4. mijenja se i glasi:

"Prijedlog za finansiranje organizacija iz stava 1. ovog člana daje Kantonalno ministarstvo."

Član 46.

Iza člana 44. dodaje se novi Odjeljak: "3. Zajedničke odredbe o statusu OOSI, OCŽR i statusu reprezentativnosti"

Član 47.

Iza člana 119. dodaju se novi članovi 119a., 119b., 119c., 119d., 119e., 119f., 119g., 119h., 119i i 119j koji glase:

Član 119a.

Prestanak statusa OOSI i OCŽR utvrdiće se rješenjem Kantonalnog ministarstva, i to:

- po zahtjevu nositelja statusa;
- brisenjem udruženja iz registra udruženja prema važećim propisima o udruženjima i fondacijama;

- ukoliko nosilac statusa ne djeluje u skladu sa članom 117b.

Pored razloga utvrđenih u stavu 1. ovog člana, Kantonalno ministarstvo će po službenoj dužnosti rješenjem utvrditi prestanak statusa reprezentativnosti OOSI i OCŽR ukoliko se utvrdi nenamjensko trošenje sredstava.

Prestanak statusa OOSI i OCŽR i status reprezentativnosti OOSI i OCŽR će se rješenjem iz stava 1. ovog člana utvrditi ukoliko se u postupku nadzora utvrdi da je nositelj statusa prestao ispunjavati bilo koji od uvjeta propisanih u Poglavlju IV ovog Zakona.

Reprezentativna OOSI i OCŽR kojoj je utvrđen prestanak statusa reprezentativnosti zbog nenamjenskog trošenja sredstava nema pravo prijave na vanredni i prvi sljedeći redovni javni poziv za utvrđivanje statusa reprezentativnosti.

Rokovi iz stava 2. ovog člana računaju se od dana donošenja rješenja o prestanku statusa.

Član 119b.

Kantonalno ministarstvo vodi registar OOSI i OCŽR kao i registar reprezentativnih OOSI i reprezentativne OCŽR.

Član 119c.

Za svaku OOSI i OCŽR, u registar se obavezno unosi sljedeće:

- redni broj upisa,
- datum podnošenja zahtjeva za utvrđivanje statusa,
- naziv i sjedište udruženja,
- ime i prezime osobe ovlaštene za predstavljanje i zastupanje,
- ime, prezime i datum rođenja svakog člana,
- vrsta i stepen invaliditeta svakog člana,
- broj i datum rješenja o utvrđivanju statusa,
- druge podatke u vezi sa promjenama od utjecaja za utvrđeni status.

Sve promjene u podacima koji se vode u registru, udruženja su dužna prijaviti Kantonalnom ministarstvu, najkasnije u roku od 15 dana od dana nastanka promjene.

Član 119d.

Ministar će, u roku od 60 dana od dana stupanja na snagu ovog Zakona, posebnim propisom utvrditi način uspostave i detaljan sadržaj registra, obrazac članstva, kao i procedure vođenja i unosa podataka u registar OOSI i OCŽR, reprezentativnih OOSI i reprezentativnih OCŽR.

Član 119e.

Kantonalno ministarstvo vrši nadzor nad primjenom odredbi sadržanih u Poglavlju IV ovog Zakona.

Nadzor se vrši prema unaprijed utvrđenom planu koji donosi ministar, a najmanje jednom u toku godine.

Nadzor vrši komisija koju imenuje ministar.
Rješenjem o imenovanju komisije ministar određuje način provođenja nadzora.

Član 119f.

Nakon provedenog nadzora komisija sastavlja zapisnik koji čini sastavni dio konačnog izvještaja, koji se po izvršenom cjelokupnom nadzoru dostavlja ministru.

Zapisnik komisije o izvršenom nadzoru i rješenje ministra sa predloženim mjerama i preporukama dostavlja se organizaciji nad kojom je izvršen nadzor, a koja je dužna postupiti po istim, i u ostavljenom roku o tome organu nadzora predočiti dokaze. "

Član 119g.

Postupak, kriteriji, način raspodjele sredstava, namjena i svrha dodijeljenih sredstava, izvještavanje i obrasci izvještavanja, kontrola utroška i druga pitanja u vezi sa namjenskim utroškom sredstava, utvrdiće se posebnim propisom koji donosi ministar, u roku od 60 dana od dana stupanja na snagu ovog Zakona.

Član 119h.

Organizacije su dužne dodijeljena sredstva trošiti u skladu sa namjenom utvrđenom u članu 119. ovog Zakona.

Bliža namjena i svrha utroška sredstava, kao i međusobna prava i obaveze korisnika i davaoca sredstava, definisati će se ugovorom.

Član 119i.

Odgovorna osoba i organi upravljanja udruženja odgovorni su za namjensko trošenje sredstava i izvještavanje u skladu sa ovim Zakonom i podzakonskim aktima te propisima o budžetskom i finansijskom poslovanju.

Kontrolu namjenskog utroška sredstava vrši Kantonalno ministarstvo.

Izvještaj o izvršenoj kontroli sadrži zaključak o činjenici jesu li sredstva utrošena namjenski ili nenamjenski.

Član 119j.

U slučaju kada se u postupku nadzora iz člana 119e. utvrdi da su sredstva utrošena nenamjenski, reprezentativna OOSI ili reprezentativna OCŽR dužna je vratiti dodijeljena sredstva.

Organizacija kod koje se utvrdi nenamjensko trošenje sredstava, gubi status reprezentativnosti danom objave rješenja o prestanku u službenim novinama.

Član 119k.

Reprezentativne OOSI i reprezentativna OCŽR dužne su uspostaviti i voditi kancelarije za obavljanje zadataka iz člana 117b. ovog Zakona.

U roku od 60 dana od dana stupanja na snagu ovog Zakona, ministar će posebnim aktom propisati način uspostave i vođenja kancelarija iz stava 1. ovog člana."

Član 48.

U članu 126., u stavu 2. riječi: "prosječne plaće" zamjenjuju se riječju: "osnova".

Član 49.

U članu 132. stav 2. mijenja se i glasi:

"Izuzetno od člana 6. pravo na dodatak na djecu imaju porodice u kojima dijete i barem jedan od roditelja ispunjavaju uvjete u pogledu državljanstva/stalnog boravka."

Član 50.

U članu 133. riječi: "prosječne plaće" zamjenjuju se riječju: "osnova".

Član 51.

Član 135. mijenja se i glasi:

"Član 135.

Dodatak na djecu ne mogu ostvariti porodice u kojima je jedan ili više članova zajedničkog domaćinstva vlasnik privrednog društva ili ima registrovanu obrtničku ili srodnu djelatnost, osim ako je privredno društvo u postupku stečaja ili likvidacije, odnosno porodice u kojima je jedan ili više članova zajedničkog domaćinstva vlasnik motornog vozila osim vozila koje služi za prijevoz osobe ili člana domaćinstva kojem je na osnovu Federalnog i ovog Zakona utvrđena potreba za pomoći i njegom od strane druge osobe."

Član 52.

Član 137. mijenja se i glasi:

"Član 137.

Dodatak na djecu pripada djetetu do navršene osamnaeste godine života ukoliko ispunjava uvjete predviđene Federalnim zakonom i ovim Zakonom.

Dodatak na djecu pripada djetetu koje se nalazi na redovnom školovanju, a najkasnije do navršenih 27 godina života.

Djetetu kod kojeg nastupi nesposobnost za privređivanje prije navršene osamnaeste godine života ili dok se nalazi na redovnom školovanju pripada dodatak na djecu do navršenih 27 godina života.

Dodatak na djecu isplaćuje se i za vrijeme školskog raspusta."

Član 53.

U članu 138. riječ: "specijalnom" briše se.

Član 54.

U članu 145. u stavu 1. broj: "15" zamjenjuje se brojem: "18".

Član 55.

U članu 146. stav 1. briše se.

U članu 146. stav 2. postaje stav 1., mijenja se i glasi:

"Zdravstvena zaštita osigurava se djeci do 18 godina i osobama starijim od 65 godina života, pod uslovom da nisu zdravstveno osigurani po drugom osnovu".

U članu 146. dosadašnji stavovi 3., 4., 5. i 6. postaju stavovi 2., 3., 4. i 5.

Član 56.

U članu 148. stav 2. briše se.

Član 57.

U članu 149. riječi: "prosječne plaće" zamjenjuju se riječju: "osnova".

Iza stava 1. dodaje se novi stav 3. koji glasi:

"Pod uvjetima utvrđenim u stavu 2. ovog člana naknada u iznosu od 60% osnova utvrđuje se ženi-majci kod koje je na osnovu nalaza ovlaštenog liječnika konstatovan prijevremeni porod."

Član 58

U članu 152. iza riječi: "usvojlac" dodaju se riječi: "ili hranitelj".

Član 59.

U članu 155. u stavu 2. riječi: "prosječne plaće" zamjenjuje riječju: "osnova".

Član 60.

U članu 157. riječi: "prosječne plaće" zamjenjuju se riječju: "osnova".

Član 61.

U članu 160. u stavu 1. riječi: "35% od prosječne plaće" zamjenjuju se riječima: "150% od osnova".

Član 62.

Član 161. briše se.

Član 63.

U članu 162. u stavu 2. dodaje se alineja 9. koja glasi:

"- djeca smještena u hraniteljsku porodicu".

Član 64.

U članu 164. riječi: "prosječne plaće" zamjenjuju se riječju: "osnova".

Član 65.

U članu 170. u stavu 1. u alineji 4. riječi: "izuzetne pomoći" zamjenjuju se riječima: "uvećane jednokratne novčane pomoći".

U alineji 6. riječ: "hraniteljstvo" zamjenjuje se riječima: "smještaj u hraniteljsku porodicu".

Alineja 17. briše se.

U alineji 23. riječi: "udruženja osoba sa invaliditetom" zamjenjuju se riječima: "OOSI i OCŽR".

Član 66.

U članu 171a. dodaje se novi stav 4. koji glasi:

"Kantonalno ministarstvo može voditi evidencije osoba sa invaliditetom, civilnih žrtava rata i osoba koje se nalaze u riziku od siromaštva ili socijalne isključenosti."

PRELAZNE I ZAVRŠNE ODREDBE

Član 67.

Propis iz člana 31. ovog Zakona donijeće Vlada Kantona u roku od četiri mjeseca od dana stupanja na snagu ovog Zakona.

Član 68.

U roku od šest mjeseci od stupanja na snagu ovog Zakona, Kantonalno ministarstvo će raspisati javni poziv za zainteresovana udruženja građana da podnesu zahtjev za evidentiranje kao OOSI i OCŽR.

U roku od osam mjeseci od dana stupanja na snagu ovog Zakona, Kantonalno ministarstvo će raspisati javni poziv za utvrđivanje statusa reprezentativnosti OOSI i OCŽR.

Po isteku rokova iz stavova 1. i 2. ovog člana, utvrđivanje statusa OOSI i OCŽR vršiće se po pojedinačnim zahtjevima, a utvrđivanje statusa reprezentativnosti putem javnog poziva.

Član 69.

Postupci koji su pokrenuti prije stupanja na snagu ovih izmjena i dopuna, a nisu okončani okončaće se po odredbama ovog Zakona.

Član 70.

Ovlašćuje se Zakonodavno-pravna komisija Skupštine Kantona Sarajevo da utvrdi Novi prečišćeni tekst Zakona o socijalnoj zaštiti, zaštiti civilnih žrtava rata i zaštiti porodice sa djecom.

Član 71.

Ovaj Zakon stupa na snagu osmog dana od dana objavljivanja u "Službenim novinama Kantona Sarajevo."

Broj:
Sarajevo, 2019. godine

**PREDSJEDAVAJUĆI SKUPŠTINE
KANTONA SARAJEVO**

Elmedin Konaković